

四庫全書

史部

欽定四庫全書

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷四十九

訓將士三

附

恤兵

康熙五年丙午七月甲辰

上諭戶部防守地方撲滅盜賊皆需乎兵兵惟錢糧是賴
支給解送錢糧何可遲誤今見各省因協餉不至以數
月未給兵餉具奏者甚多或係爾部不撥實在錢糧將

雜項抵撥以致請報往返徒費時日或係地方官借稱
協解未齊以致遲延俱未可知嗣後撥餉時務撥實在
款項嚴定期解送或因別故將別項錢糧協解該督
撫速行題報其違限及借端推諉者作何處分爾部詳
確議奏

康熙十九年庚申三月壬寅

上諭議政王大臣等曰前遣往廣西大兵勞苦日久宜令
更番休息可撥京師每佐領護軍二人驍騎三人漢軍

一千人令都統麻齊趙璉副都統洪世祿祖植椿等率
往更替

閏八月乙未

上諭兵部今四方悉就蕩平惟滇黔餘孽尚爾稽誅前經
會議各路官兵俱於八月內進剿茲師期已屆士馬飽
騰正宜分路竝進奮勇長驅掃除殘寇以靖邊圉爾部
其速傳諭湖南四川廣西諸大將軍將軍軍督撫提鎮等
整頓兵馬速行進剿勿得借端推諉延緩時日有逗留

不前者即加重處又聞各路統領綠旗將帥不恤軍士
令為滿洲大兵蓋房秣馬及私行役使恣意虐害以致
兵卒苦累如桑額標兵逃亡千餘皆由於此不思為將
者與士卒甘苦相同加意愛養方可責其用命固惜卒
伍惟便私圖貽誤軍機深為可惡爾部即通行嚴飭嗣
後有仍蹈前轍者指名叅奏從重治罪

康熙二十一年壬戌五月乙丑

上諭寧古塔將軍巴海副都統薩布素瓦禮祐等曰朕幸

吉林地方訪詢民隱見兵丁役重差繁勞苦至極若不將各種無益差徭顯與革除兵丁人等終無裨益且不得沾實惠矣即如鷹鷂窩雛於三月尋覓四月內捕取最妨農事況所得鷹鷂不諳呼飼難至京師徒勞人力應行停止又自八月放鷹原欲令其調習以便齎送數年來竝無名鷹貢至京師而烏喇地方兵丁輒於冬寒之時尋覓山鷄人馬勞頓應行停止又圍獵以講武事必不可廢亦不可無時冬月行大圍臘底行年圍春夏

則視馬之肥瘠酌量行圍令貧人採取禽獸皮肉須預先傳示日期以便遵行所獲禽獸均行分給其圍獵不整肅者照例懲治不可時加責罰苛求瑣屑遇有猛獸須小心防禦以人為重勿致誤有所傷又如打鱣鯉等魚既有專管西特庫等烏喇兵丁應停差役其搬移新滿洲採取造房并船隻桅木等項及偵探巡邏等差俱係軍務乃駐防官兵專責不可寬假應照常行此外偶爾差遣大臣侍衛督看採取東珠砍伐木植尋覓鷹鷂

不涉每歲定例所行之事似無過勞此後將軍以下撥
什庫以上應念兵丁遠居邊境衝冒嚴寒往採山木妻
子汲水操作備極艱辛時加憐憫吉林烏喇田地米糧
甚為緊要農事有悞關係匪細宜勸勉之使勤耕種朕
軫念滿洲人民生理欲遣人專往以驛遞疲敝故因筆
帖式來奏特諭知之

七月甲戌

上諭兵部近因逆賊蕩平四方底定將經制之外增設綠

旗兵丁議令裁汰於二年內陸續報完原以寬恤民力
救寧地方今思各處兵丁多有隨征進剿効力行間綿
歷歲時備嘗艱苦事平回汎若漫無分別一槩裁汰深
為可憫可令該督撫提鎮等官於裁汰之時詳加察閱
不得混留私人反將曾經効力兵丁輒行裁退至於已
裁兵丁及投誠歸農人等恐有無籍可歸艱於生計者
令各省所司官設法安插善加撫輯務俾有以資生毋
致流離失所擾累平民爾部即通行申飭文武大小各

官實心奉行殫力料理以副朕恤兵愛民至意

康熙二十九年庚午九月戊子朔

上諭大學士等曰盛京兵丁全賴田畝耕獲及月給糧餉
以為資生之計昨歲盛京禾稼不登貧困兵丁難以粒
食曾以屯糧頒發賑救頃值軍興遣一等侍衛齊蘭布
往調盛京兵丁隨發諭旨令無馬匹者給與官厰馬匹
無行糧者給以莊屯糧米官兵踴躍徼征倉卒之際置
辦一切軍裝遂領明年二月分應給俸餉又預支五個

月錢糧尅期進發比厄魯特噶爾丹敗遁盛京官兵雖未接戰而奮勇敢愼深可嘉悅今若將預支俸餉復行扣抵則窮乏兵丁必至生計艱窘朕心殊切憫惻所預給明年二月分應支俸餉及增給五個月錢糧免其扣抵仍令照常支給以示朕愛養將士軫恤疾苦至意

康熙三十四年乙亥正月乙酉

上諭兵部朕巡視京畿見綠旗兵沿途奔走無頃刻之暇甚屬勞苦深為可憫問之則云兵部內私用印信文移

護送家口等事甚多除已往之事不復察究自後爾部
移文各處總兵官將派出兵丁護送大臣官員事件數
目年終詳明造冊送爾部察奏

五月丙寅

上諭大學士等曰爾等傳諭八旗滿洲蒙古都統各將前
鋒護軍披甲兵丁之實無房舍者身自確查於此月初
十日保奏凡官員子弟及有房舍與家僕披甲者不必
查

辛未

上諭大學士等曰覽八旗都統所查無房舍者七千有餘人未為甚多京師內城之地大臣庶官富家每造房舍輒兼數十貧人之產是以地漸狹隘若復歛取房舍以給無者譬如剗肉補瘡其何益之有貧乏兵丁僦屋以居節省所食糧以償房租度日必至艱難今可於城外按各旗方位每旗各造屋二千間無屋兵丁每名給以二間於生計良有裨益此屋令無得擅鬻兵丁亡退者

則收入官大畧計之約費三十餘萬金譬之國家建一大宮室耳敕下欽天監相視汝等及八旗都統身往驗看宜建造之處奏聞

九月丁丑盛京將軍公綽克託等疏言開原等處馬甲月給米二倉斛步甲月給米一倉斛今倉米不敷俟明年海運之米補給

上諭大學士等曰此奏甚屬踈忽馬甲之中亦有人口少者步甲之中亦有人口多者一倒按甲支給可乎來年

海道運米未可預必其全到即盛京田穀亦難預必其全收凡事須曲盡籌畫豈可拘執定議此本發回令察明人口給米

庚辰

上諭大學士等曰開原等處給散兵丁米穀若令行查必稽時日兵丁或至重困着朱都納嵩祝前往將不能度日人口數目查明一面散給一面具題

康熙四十一年壬午閏六月癸未戶部議覆山

西巡撫噶禮疏言右衛駐防官兵浮給康熙三十
六年分草束折色銀兩請交各該旗追還

上曰此浮給官兵草束折色銀兩復行追賠殊為可憫若
向悞給官吏追補必致派累小民其槩免之

康熙四十二年癸未四月乙亥

上諭八旗都統前鋒統領護軍統領副都統叅領佐領等
曰朕為官兵生計不時廛念前已屢施大澤今年詔款
內復特沛鴻恩不惜數百萬帑金遍行賞賜嗣後兵丁

人等應人人務立生計清償風逋豐裕度日倘有不肖之輩不思撙節儉約惟知縱酒酣飲鮮衣肥馬過於費用則不數日間仍如未沛恩澤時也爾等俱有督率之責不當徒以督率為名亦當誘之向善使人人以孝弟為本各知自守愛惜產業則不特風俗可至淳樸而朕愛人之心亦不致徒勞矣可將此旨刊刻遍示軍卒人等受朕重恩如此倘仍行賭博行止不端朕斷不輕貸必將為首者立正典刑朕念切兵民生計是以親書諭

旨

十一月辛酉

上巡行陝西駐蹕西安府

諭將軍博齊曰朕巡歷江南浙江盛京烏喇等處未有能
及爾西安兵丁者爾處官兵俱嫻禮節重和睦尚廉恥
且人材壯健騎射精練深可嘉尚慎勿令其變易

康熙四十五年丙戌十一月癸酉

上諭戶部朕念八旗禁旅為國家根本所繫每加恩愛養

用俾生計充盈或動支公帑數百萬代清積逋或於各旗設立官庫資濟匱絀所以為衆甲兵籌畫者甚切康熙四十二年又曾頒發帑金貸給八旗兵丁共六百五十五萬兩有奇至康熙四十五年冬除陸續扣完外尚未完銀三百九十五萬六千六百兩有奇若仍行按月扣取恐各兵丁營辦器用贍養家室必有不敷之慮朕深切軫惻茲特大沛恩施式弘撫育將未經扣取銀兩通行豁免爾部即傳八旗都統等出示遍諭俾咸知朕

優恤禁旅至意

康熙四十六年丁亥三月壬戌

上南巡

諭江寧將軍朱滿曰朕前至江寧賜此地兵丁一月錢糧
京城馬匹甚多入秋令解來給江寧兵丁此時兵丁有
馬倒斃者且勿買補

十月壬辰

上諭內務府據河屯營守備楊宏德奏稱駐防河屯兵丁

二百名已給錢糧請將原給地畝交回朕思兵丁內陞轉病故者伊等妻子既無地畝又無錢糧何以養贍著將地畝仍令伊等耕種

康熙四十九年庚寅正月乙未

上諭八旗都統等曰八旗兵丁一人所得四十斛之米人口多者適足養贍人口少者食之不盡必至售賣與其自倉運出費腳價而復行轉賣不若計口支放餘者照時價給銀於兵丁有益爾等即傳諭戶部

四月辛酉右衛將軍宗室費揚固疏請右衛空間
官房交該撫照時值變價

上諭大學士等曰滿洲戶口滋息甚繁兵丁內無屋可居
者有之右衛現有所造空房若增駐兵丁極是善策爾
等可會同領侍衛內大臣八旗都統副都統滿九卿議
奏

康熙五十五年丙申十月癸巳

上諭兵部國家綏靖邊圉剪除賊寇必須士馬飽騰方克

立奏膚功恤兵之道宜急講也朕御極五十餘年無時不以愛養士卒為念內而八旗禁旅外而各省綠旗兵丁視同一體或代還私債或遣官犒賞或嚴禁剋減所以體恤之者惟恐不至近策妄阿喇布坦狂逞跳梁侵我哈密故特徵兵預備既已轉輸糗糧又復頒給馬駝籌畫倍周加惠尤渥而山陝綠旗兵丁首奉調遣遠途跋涉資用惟艱因而預借公帑朕念從軍兵丁披堅執銳戮力戎行又責以還帑深可憫惻綠旗兵丁所借帑金

四萬八千八百餘兩咸與蠲除並嚴飭統轄將領實心奉行倘有仍行私扣者該督撫據實指叅從重治罪以仰副朕軫恤邊兵至意

康熙五十六年丁酉九月丁巳靖逆將軍尚書富寧安奏稱官兵整理軍器等物支借俸祿銀糧共計銀二十五萬六千兩有餘俟事定之日扣除

上曰此次官兵雖未臨陣克取地方然同心効力甚屬可

嘉將朕內庫銀兩發出二十六萬令其整理馬匹器械如恐路遠不能即達將附近地方所有錢糧著戶部速行料理成功時此項銀兩不必扣除若無効力之處空回各本汛者仍行扣除現將內庫銀兩照數交與戶部此項錢糧係朕特恩其另造檔案務令清楚

癸酉四川陝西總督鄂海疏言西寧鎮標官兵因前往噶斯駐防借領六個月俸餉若照數扣除各兵無以自給請將已換班回西寧官兵每

季扣除一月仍留兩月糧餉給兵養贍再現今駐防噶斯官兵亦每季將兩月糧餉解送軍前給散本兵留一月糧餉贍養伊等家口俟換班回西寧之日陸續扣還

上曰噶斯換班回來竝現往駐防官兵所借糧餉著暫停扣除俟功成事竣作為朕所賞賜如不成功照該督所題扣除其行月糧餉送至軍前併存留贍養家口之處著照該督所題給放

康熙五十七年戊戌正月戊寅

上諭議政大臣等曰兩路軍兵駐扎邊塞二三年矣勞苦殊甚衣服亦將損敝朕深加軫念特令製衣二萬襲現今所有一萬襲派侍衛一員由內地驛站送至將軍富寧安軍前賞給軍兵再一萬襲俟製完日送至將軍傅爾丹軍前著爾等大臣查驗裝載牢固發往如尚有不敷計算軍兵數目照此衣服將庫貯布匹賞給令其自行製造

八月癸未

上命內閣學士渣克旦副都統薩爾禪等前往索倫賑恤諭之曰索倫人等効力圍場甚屬年久亦有現在出兵之人今被水災朕甚惻然令爾等前往散賑爾等會同將軍副都統將被災之人逐一查明無房屋者即給房屋無衣服者即給衣服務令均沾實惠以副朕軫恤至意

十二月巳酉

上諭大學士等曰福建廣東地方潮濕馬匹難存所倒馬

匹若屢令償賠必致苦累兵丁業已給過草料銀兩者免其追賠著照綠旗兵丁例半為馬兵半為步兵馬兵人各養馬二匹爾等會同議政大臣九卿議奏

康熙五十九年庚子十月庚戌

上諭兵部朕惟國家綏乂地方愛養兵民實係緊要朕自臨御以來夙興夜寐無時不以兵民生計為念比年策妄阿喇布坦蠢動跋扈侵我哈密殲及拉藏占取藏地騷擾土伯特唐古特人民再吐魯番之人近四川雲南

一帶邊境居住準噶爾人等若將吐魯番侵取又將土伯特唐古特人民鼓惑侵犯青海不但難於應援亦且難於取藏是以調四川雲南滿漢官兵由拉里進藏官兵俱感朕養之恩遵朕指授各加奮勵直抵險遠絕域克取藏地殊堪軫念應大沛恩澤四川雲南滿漢官兵從前所領俸餉俱著免其扣取仍遣堂官將取藏之四川雲南官兵每人賞銀十兩即給本人妻子以示朕軫恤官兵勞苦之至意爾部即遵諭行

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷四十九

欽定四庫全書

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷五十

褒忠節

康熙十四年乙卯三月丁丑

上諭兵部寧夏總兵官陳福効力嚴疆勞績素著屢次舉
首逆劉克篤忠貞且其妻子家屬現在川中逆賊挾此
招誘全無顧戀矢志不移深為可嘉著以現兼職銜陞

補陝西提督仍暫駐寧夏管總兵官事俟平涼底定之後即赴該管地方料理提督事務陳福之弟守備陳奇妻子家口亦陷賊中深為可憫著從優以叅將陞用爾部即遵諭行

閏五月壬子

上諭吏部兩廣總督金光祖奏稱懷集縣知縣李雲龍著有功績積勞殞命如俟事平議敘則孀母孤兒久待可憫李雲龍係旗人其旅櫬及家口應沿途護送歸旗著

督臣給以水陸夫船再給藩庫銀一百兩以資孤寡

九月庚戌吏部奏陝西定邊營守備劉士英當朱
龍反叛同妻子殉難照旗下陣亡官員例優給拖
沙喇哈番卹銀四百兩

上曰劉士英不肯從逆同妻子殉節深為可憫與一身陣
亡者不同可更從優給拜他喇布勒哈番卹銀五百兩
十一月庚寅

上諭吏部禮部凡有世職官員以下及有頂帶官員以上

陣亡無承襲子嗣銷去所給官職者照伊陣亡所得之官併其原官品級給與祭葬著為令

康熙十六年丁巳三月癸卯

上諭吏部戶部兵部自逆賊吳三桂煽亂以來凡用兵地方文武官員或矢志固守勢窮莫支盡節封疆或身陷賊中堅貞不屈橫被慘害或從容就義全家殉難視死如歸此皆為國捐軀克全忠節深為可憫其有骸骨未能歸葬妻子尚寄遠方孤苦無依更堪軫惻宜加恩卹

以慰忠魂著各該督撫察明凡殉難文武大小官員骸骨妻子俱准動正項錢糧資送歸里以昭朕優卹忠節至意

五月壬辰

上諭福建水師提督海澄公黃芳世曰爾父子功烈素著復全家殉難每念及此朕心深為傷悼况爾由粵東進勦忽遭廣省兵變孤身涉險而出可見忠貞不貳顛沛不改其守今仍襲海澄公鎮守福建水師提督總兵官

宜愈加訓練鼓舞將士以靖海氛使地方秋毫無犯百姓安堵方為不負封疆重寄

康熙十八年己未六月丙寅殉難廣西巡撫馬雄鎮之子馬世濟疏請赴粵西取父骸骨

上曰馬雄鎮當地方叛亂之時不肯從逆克篤忠貞捐軀殉難深為可憫其骸骨併家口令馬世濟馳驛前往搬取仍著麻爾吉等預為察明料理交與馬世濟到日從優議卹

十月戊子辰州永興陣亡參贊軍務都統宜理布
參贊軍務護軍統領哈克山及諸將士喪至

上命內大臣公噶布喇等四十七員各以茶酒往奠之復
遣侍衛費耀色等齎銀六百兩賜宜理布之母傳
諭曰宜理布時侍朕前深悉其人今出師著有勞績方謂
成功之後即可凱旋相見忽聞陣歿朕還顧議政王大
臣不覺悽愴痛悼茲聞爾家費用不給特賜白金六百
兩治喪又

命內大臣舅舅佟國維等齎銀五百兩賜哈克山之弟巴

克山傳

諭曰哈克山臨陣捐軀戮力盡瘁殊為可嘉特賜白金五

百兩又傳

諭正白旗大臣侍衛等曰退朝後於宜理布未出喪以前
即赴喪次舉殯時除值日大臣侍衛外餘俱往送其哈
克山噶爾圖色黑郭色門度那穆渾舉殯時分遣內大
臣或散秩大臣一員侍衛等往送

康熙十九年庚申四月壬戌

上諭吏部兵部自吳逆叛亂以來凡用兵地方文武官員
有矢志忠貞克篤臣誼抗賊不屈捐軀殉難者幽忠難
泯大節可風彼時即宜錫以卹典但以各處尚未蕩平
其中有情節未確者有應行察訪者不得已緩至今日
朕每念及深為惻然茲各路會勦大勢底定餘氛指日
殲滅其殉難各官應加褒卹以慰忠魂爾等即詳察議
奏

康熙二十年辛酉二月丙申戶部題故平南王尚可喜子尚之隆請給其父在日所賜海州房地

上曰平南王忠誠勞勩堅守臣節其房地遣司官一員速往撥給

五月甲子隨內大臣班尚之孝奏請迎其父尚可喜喪

上曰尚可喜當通城背叛時矢志不移臨歿猶被服

太宗皇帝所賜朝衣言雖死必葬於海州倘有知覺必効

力於

先帝其忠誠之心始終無二今尚之孝前往可令其將還京之日預行啓奏遣官往德州前後迎其骸骨尋尚可喜喪至遣侍衛鎖住等往奠之

庚午兵部題殉難雲南巡撫朱國治喪櫬家屬請令大將軍貝子章泰等察明送京

上曰吳三桂反叛以來地方官有從逆者亦間有逃歸者如朱國治仗節不屈罵賊身死殊可嘉尚如議速行

康熙二十七年戊辰八月丁未

上諭諸王大臣等曰凡地方官城存與存城亡與亡者乃人臣之分近有武昌兵亂葉映榴守義不屈罵賊自刎朕閱其遺奏五內傷悼王大臣等其共聽之因令展讀奏疏聞者莫不感泣隨

諭吏部禮部葉映榴值裁兵鼓譟抗志不屈捐生殉難忠節可嘉今覽遺疏情詞慘烈朕心深為惻然不忍披閱應從優賜卹以表忠貞

康熙二十八年己巳二月戊午

上駐蹕蘇州府

諭扈從部院諸臣曰楚省兵譁時湖廣糧道葉映榴盡節捐軀朕心深加憫悼特詔所司優贈亞卿兼予卹廕今巡行江南見其子葉勇迎伏道左彌增軫惻應特予諡以彰異數隨

御書忠節二字賜之

康熙三十八年己卯三月丙申

上駐蹕杭州府

賜湖州府知府陳一夔父故溫處道陳丹赤

御書名垂青史匾額

諭曰爾父為國殉難朕至今憫之賜此特表爾父之忠

康熙四十九年庚寅十二月戊辰海澄公黃應纘

疏稱伊父黃芳泰蒙

恩以總兵官承襲公爵今歿已二十餘年尚未營葬懇賜

卹典

上諭大學士等曰平定三逆之事朕知之甚明黃應纘之

祖黃梧

世祖章皇帝時曾遣人令伊投降因海寇鄭芝龍齎書阻之故黃梧未降後鄭芝龍之子鄭成功寇鎮江瓜洲貝子羅託總兵官梁化鳳內外夾攻大破之餘賊敗北投黃梧黃梧遂獻海澄縣歸順因封為海澄公黃梧故後公爵與伊子黃芳度承襲黃梧之弟有二子長子黃芳世次子黃芳泰黃芳世自一等侍衛授廣東總兵官耿

精忠叛時黃芳度堅守漳州府舉家被害黃芳泰逃至廣東請兵值尚之信叛黃芳泰同伊兄黃芳世巡撫楊熙力戰而出黃芳泰等實心効力所立功績部中亦有檔案著該部查明賜卹

康熙五十二年癸巳五月癸卯禮部題黃巖守備管遊擊事閻福玉與海賊戰亡業已蒙

恩賜卹贈叅將廕子弟一人以守備用其祭葬相應停止上曰閻福玉係登州人朕曾召見人材壯健戰時為賊所

傷血流滿面謂衆曰此即報主之處也奮勇前進手刃
十餘人力戰而亡此係與伊交戰賊人所說宜優加恩
賜以示鼓勵著給與祭葬

康熙六十年辛丑十一月壬辰

上諭大學士等曰原任總督額倫特侍衛色楞副都統查
禮渾皆陣亡伊等世職俱著承襲又陣亡提督康泰總
兵官康海司九經俱著議敘伊等有世職亦著承襲西
安佐領札木素在軍中頗出力索倫之藍翎查倫察頗

勇猛射死數賊身受重傷自盡俱著交部議敘

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷五十

欽定四庫全書

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷五十一

卹舊勞

康熙元年壬寅正月庚寅

上諭吏部原任大學士希福范文程甯完我額色黑皆自
太宗文皇帝時歷任內院贊理機務効力最久勤勞素著
其子宜加擢用以示鼓勵范文程子范承謨額色黑子

塞思赫已補內院學士希福甯完我各一子亦著以學士用

康熙二年癸卯五月甲戌

上諭禮部滿漢官員卹典已有定例其一品官員與諡者宜加優異以示酬庸以後一品官員曾經與諡者除造墳外仍著予立碑

八月庚子

上諭兵部綠旗官員任滿三年病故有加贈等第滿洲官

員病故者無加贈等第今滿漢俱應一體爾部議奏

康熙八年己酉五月己亥內祕書院學士禪布奏
伊祖達海巴克式蒙賜諡文成請立石碑以光永
久

上曰達海巴克式通滿漢文字於滿書加添圈點俾得分
明又照漢字增造字樣於今賴之念其効力年久著有
勞績著追立石碑

六月壬申

上諭吏部兵部蘇克薩哈奉

皇考遺詔輔政雖係有罪罪止本身不至誅滅子孫後嗣此皆鰲拜等與蘇克薩哈不和挾讐滅其子孫後嗣深為可憫其白爾黑圖等竝無罪犯因係族人連坐誅戮殊屬冤枉其蘇克薩哈原官及白爾黑圖等官職俱應給還爾二部將此案所革官員俱行查明議奏

七月壬寅

上諭吏部朕閱處分原任戶部尚書蘇納海等原案竝無

大罪鰲拜等但以為撥地遲延行拏問多端文致誣陷不按律文任意將無辜處死原任總督朱昌祚巡撫王登聯於撥換地畝時見民間旗下困苦因有地方之責具疏奏聞輒以為非其職掌越行干預亦不按律文冤枉處死伊等皆國家大臣竝無大罪冤死殊為可憫理應昭雪以示仁恩作何恩卹予謚及廕子入監讀書爾部詳議以聞

康熙九年庚戌二月丁丑先是內國史院大學士

衛周祚引疾乞歸

上念其勤勞有年給祿如故俟病痊起用至是衛周祚以
在籍支俸三年受恩過當具疏辭俸

上曰卿在任著有勞績回籍調理特給祿以資頤養可仍
遵前命祇受勿辭

乙酉

上諭吏部兵部向來包衣佐領下官員子弟不准為廕監
生其筆帖式亦無品級今思內外官員効力相同加恩

豈宜有異嗣後包衣佐領下官員子弟應否為廕監生及筆帖式應否授品級爾部定議以聞

康熙十一年壬子六月辛丑先是兵部尚書王弘祚引年乞休

上念其舊勞命乘傳歸籍仍令滇省藩司給俸至是王弘祚疏辭

上曰卿在官著有功績引年乞休特給俸祿以資頤養其仍遵旨祇受不必控辭

康熙十二年癸丑二月辛酉

上諭致仕耆舊大臣等曰國有耆舊大臣規模甚覺可觀其大臣等有疾若必俟奏明請醫恐致遲滯嗣後有疾者於藥房諸醫中惟其所擇延往調治不必奏聞朕亦即傳諭諸醫知之

康熙十三年甲寅六月甲午朔

上諭兵部耿精忠之祖耿仲明於

太宗文皇帝時航海歸誠優錫王爵効力行間勞績茂著

及其身故睿親王不令承襲

世祖章皇帝追念舊勲特允其子耿繼茂仍襲王爵令兩鎮巖疆為國藩屏爰及朕躬惓懷勲裔恩寵有加後覽其病終遺疏有地方兵民凋敝賊寇未滅死不瞑目等語忠義肫篤深切軫念且因耿繼茂之子耿精忠自幼曾為近侍予襲王爵仍鎮閩省朕以耿精忠必能紹祖父遺訓殫竭忠猷無忝先烈乃不意近為逆賊吳三桂誘惑煽亂地方棄累世之忠貞構一旦之狂悖既干國

法復隆家聲朕猶念其祖父前功耿精忠係一時無知
墮人狡計與吳三桂不同故將吳三桂子孫正法耿精
忠在京諸弟照舊寬容所屬官兵竝未加罪今遣寧南
靖寇大將軍多羅順承郡王勒爾錦由湖南進兵鎮南
將軍尼雅翰由廣西進兵安西將軍赫業及西安將軍
瓦爾喀等已克七盤朝天等關直抵保寧尅期恢復全
蜀三路攻取雲南吳逆指日授首定南將軍希爾根由
江西進兵平南將軍賴塔由浙江進兵平寇將軍根特

巴圖魯由廣東進兵三路攻取福建又遣揚威將軍阿密達鎮西將軍席卜臣安南將軍華善鎮東將軍喇哈達等各領大兵駐扎江南京口等處調度征勦耿精忠殲滅亦在旦夕但念耿精忠祖父宣力累朝今及其身遽至覆亡宗祀斬絕朕心深為不忍且吳三桂乃本身投誠之人背恩反叛自取誅戮耿精忠自祖父以來受恩三世四十餘年非素蓄逆謀首倡叛亂者比爾部即傳諭耿精忠果能追念累朝恩德及伊父忠藎遺言革

心悔禍投誠來歸將侵犯內地海賊速勦圖功即赦前
罪視之如初朕以至誠待天下誥諭昭如星日俾其善
自審度勿負朕保全勲舊之意爾部即遵諭速行

七月辛卯

上諭兵部耿精忠身雖背叛念其祖父投誠効力累世舊
勲朕豈肯以耿精忠之罪及其先人大兵平定閩省之
日其祖父骸骨仍許收葬

十一月庚辰

上諭兵部平南王尚可喜孫女嫁為耿精忠子婦年未二旬忽遭事變王係勲舊大臣為國勤勞忠藎茂著其孫女理宜保全我兵勦平閩省之日大將軍王等務留心察救給王團聚又

諭曰平南王尚可喜疏奏續順公沈瑞眷屬尚多淪陷閩中念沈瑞亦係勲舊眷屬宜與保全其令大將軍王等一體留心察訪勿致失所

康熙十五年丙辰二月癸丑朔

上諭平南王尚可喜曰王累世勲舊奇猷重望久鎮巖疆
勞績懋著自逆賊變亂以來王篤守忠誠殫抒籌畧訓
練士卒保障地方勦禦賊寇朕所倚毗今覽王奏稱年
老漸衰身嬰疴疾請遣大臣經理廣東事務具見王實
心為國計慮周詳朕與王情同父子誼若手足覽疏未
竟朕心惻然但王屬官兵駐鎮日久地方寧謐措置咸
宜軍民依賴若別遣大臣前往恐該省之事一時未能
周知所關匪細王可於諸子中擇才畧素優者遣赴潮

州整理軍務大將軍平南王尚之孝回省城侍王左右
扞衛封守王其加意調護期於平復以慰朕憂慮眷念
至意

七月壬辰

上諭兵部吳逆背叛以來潛布偽書煽惑人心原任提督
陳福妻子雖在四川毫無瞻顧篤志忠貞勦禦賊寇恢
復城池功績茂著及率兵進勦固原中途為叅將熊虎
等所害前因變出倉猝不能救之兵弁俱釋不問今既

察明熊虎等四人實係首惡斷難寬恕即行正法以懲姦宄其餘兵弁各守汛地毋得牽連嗣後再有首告者即以其罪罪之其徧諭寧夏提標官兵知悉

八月丙子

上諭吏部兵部撫遠大將軍都統大學士圖海器識老成才猷練達贊襄機務宣力累朝以文武之長才兼忠愛之至性勞績懋著倚毗良殷前察哈爾布爾尼背恩反叛命圖海為副將軍率兵征勦運籌決勝克振軍威未

及一月捷功立奏逆賊纖滅疆圉敕寧近以平涼阻兵
日久屢命勦撫罔有成效特簡圖海為大將軍統率大
軍節制各路果爾謀畧淵深調度得宜軍鋒所至一戰
克捷更能體朕好生之心宣布恩威開誠招撫遂使平
涼慶陽固原等處文武官員兵民傾心向化悔罪歸誠
生靈免於塗炭邊境賴以保安數日之間關隴悉定皆
因籌畫周詳布置神速勦撫竝用克建膚功圖海以心
膺大臣膺秉鉞重寄實心為國克副倚任朕心深為嘉

悅於軍功議敘外應從優加恩封三等公以示朕眷注
忠勤酬答勲庸至意又

諭兵部自逆賊煽亂以來姦徒附和侵擾地方闕隴以西
疆域遼闊大兵一時未集人心不無動搖靖逆將軍侯
張勇提督王進寶總兵官孫思克一聞蘭州之變即率
兵星馳渡河勦禦收復城邑條奏機宜舉發偽劄緝獲
姦謀綏定邊陲厥功甚大及大兵攻取平涼專任靖逆
將軍侯張勇等鎮守秦鞏復殫心籌畫調度合宜勦禦

川賊屢奏捷音紓朕西顧之憂功尤茂著伊等皆宿將重臣矢志報國同心協力展布謀猷兼以訓練士卒忠義素孚故能身先行陣所向克捷其所屬將卒亦皆効力共建功績朕甚嘉之於軍功議敘之外應從優加恩以示朕獎勵忠貞酬答勲勞至意張勇著為一等侯襲十次王進寶加一等阿思哈尼哈番襲八次授為奮勇將軍仍兼管平涼等處提督事務孫思克著授為一等阿達哈哈番提督涼州軍務

康熙十七年戊午四月丙申

上諭兵部提督九門步軍統領費揚古自任事以來夙夜
勤勞殫心料理緝獲盜賊搜捕姦宄使里巷寧謐輦轂
肅清向來効力有年今尤克稱厥職應行議敘以示鼓
勵著議奏

十二月甲戌

上諭大學士等曰滿大臣有喪特遣大臣往賜茶酒滿漢
大臣俱係一體嗣後漢大臣有喪亦應遣大臣攜茶酒

往賜

康熙十八年己未十一月乙未

上諭議政王大臣等曰鄂爾多斯多羅郡王古魯當榆林
總兵官遣使請兵不及候旨即調兵應援及聞神木變
叛又即遣其子統兵先行嗣復力疾親往為國効力撫
降神木縣古魯可封和碩親王

康熙二十年辛酉四月丁酉

上駐蹕和爾和地方

諭喀喇沁杜楞郡王扎錫等曰喀喇沁故塔布囊和濟吉爾出征時最著勤勞今朕至此地遣散秩大臣鄂齊兒等攜茶酒往奠

康熙二十一年壬戌二月壬辰

上諭學士張英曰爾素性醇樸侍從有年朝夕講筵恪共盡職茲以爾父未葬具疏請假朕念人子至情忠孝皆出一理准假南旋賜白金五百兩表裏二十疋旣旌爾勤勞兼資墓田之用爾其欽悉朕惓惓至意

八月乙未原任拖沙喇哈番祁塔特叩閭稱自幼
從征得官與子都爾壽承襲緣事革職今年踰七
十乞一養贍地部議不允

上曰祁塔特効力戎伍得官與子承襲今其子革職襲次
已完而祁塔特乃身得世職者竟無資生之計朕心憫
之以後此等革去承襲之官其襲次已完者原得世職
人員應給與半俸

辛丑

上諭講官牛鈕陳廷敬曰大學士馮溥効力有年請老歸里今特賜詩一章篆章一方墨刻一冊爾等往宣朕旨朕聞山東之仕於朝者大小固結互相援引凡有涉於已私之事不顧國家往往造為議論彼倡此和務使濟其私心而後已又聞居於鄉者多擾害地方朕皆稔知其弊馮溥久在禁密之地歸里後可教訓子孫務為安靜故大學士衛周祚居鄉謹厚在閭里中若未嘗任顯秩者必如此人方副朕優禮之意

九月乙巳朔

上諭大學士等曰王進寶趙良棟當逆賊竊據漢中四川時悉力固守在外領兵諸將咸以恢復為難因特遣學士禧佛馳往傳諭從來漢人地方猝有變亂即用漢兵戡定竝無藉力滿兵之事爾等皆封疆大臣久歷戎行應各率所隸部曲將士相機進取時趙良棟即首先倡議恢復隨允所議今刻期進剿於是二人協力克取漢中至蘭州失陷時王進寶遂率兵乘筏渡河恢復蘭州

鞏昌等處勦禦賊寇所向奏功及同取漢中之後二人
意見不合嫌隙漸生遂分路進兵趙良棟直取成都王
進寶恢復保寧若成都不下則雖攻保寧未易即拔若
保寧未克則雖下成都難以固守勢必至於復退是二
人功績俱著封疆使能公爾忘私和衷共濟即統士卒
乘勝長驅則滇黔賊寇可以計日殄滅何復遷延歲月
遲至一二年之久耶且二人既克成都保寧賊衆畏懼
遂悉其精銳入川抗拒雖彼中路空虛大兵得乘機進

取沅州鎮遠貴陽等處而川中賊勢復張已恢復之疆
土幾至再陷此皆由不能和衷之所致也二人賦性鹵
莽不諳大體各懷私忿互相攻訐交圖陷害朕當二人
訐奏之初即已洞悉情事念二人功績並茂惟欲保全
絕無究察之意且一切投誠人員有免其前罪者有仍
加錄用者況此建立功績之人耶今二人俱在京師如
欲治罪何難逮問重處但朕意終以保全為念將二人
互訐章奏俱行發還概不究問其遲於救援失陷地方

卷五十一
關係軍機等事仍照例察議此非為二人調解蓋深惟
國家大體務欲保護勞臣用全終始故行申飭自今以
往二人須洗心滌慮各改前愆消釋私嫌共矢忠蓋以
副朕優待功臣至意

十二月癸未九卿議覆雲南貴州總督蔡毓榮題
土司承襲事

上曰所言承襲事似亦近理昔吳三桂未叛時征討水西
曾滅土司安坤其妻率所屬奔於烏蒙生子安世宗今

尚幼穉朕觀平遠黔西威寧大定四府土司本屬苗蠻
與民不同仍以土司專轄甚便且大兵進取雲南此土
司曾來接應著有勤勞爾等可傳出征大將軍貝子章
泰都統賴塔等詢明情形奏聞

康熙二十三年甲子二月庚戌

上諭福建提督靖海將軍侯施琅曰進勦臺灣官兵衝冒
險阻遠涉波濤効力甚久今海逆方平即行裁去殊屬
可憫應行文展界尚書杜臻學士席柱并料理錢糧侍

郎蘇拜等公同會議將閩省陸路官兵內裁汰老弱者
即以征勦臺灣官兵補額務令得所

九月甲戌

上諭大學士等曰纂修

太祖高皇帝實錄朕已敬覽畢滿漢文義俱符不失本意
其

實錄內勲舊及諸臣後裔可察明另列一單進呈如無後
者亦註明備覽

康熙二十四年乙丑五月甲申

上諭戶部原任廣西巡撫郝浴前差兩淮巡鹽潔已奉公
恤商裕課後經簡任廣西巡撫清廉愛民克稱厥職其
所動錢糧非係入已從寬悉免追取以昭朕優恤廉吏
至意爾部即遵諭行

康熙二十七年戊辰七月乙酉

上諭福建提督靖海將軍侯施琅曰爾前為內大臣朕特
加擢用爾果能竭力盡心不負任使舉六十年難靖之

寇殄滅無餘誠爾之功也邇來或有言爾恃功驕傲者
今爾來京又有言當留爾勿遣者朕思寇亂之際尚用
爾勿疑況天下已平反疑爾勿遣耶今命爾復任自此
宜益加敬慎以保功名從來功高者不克保全終始皆
由未能敬慎之故爾其勉之更須和輯兵民使地方安
靜以副朕愛兵恤民并保全功臣至意

康熙三十年辛未七月壬子

上諭大學士等曰杜立德在

世祖時著有賢聲稟性厚重行事正大非若他人徒務虛名如遇事得其情理不但不苟隨同列即於朕亦不曲從曩議政王大臣將尚之信議以正法朕以尚之信向受封爵一旦正法誠屬不忍欲令伊自裁杜立德奏曰尚之信乃背國叛逆若不加之顯戮以正國法非臣所能知也執奏甚力其他事類此者多誠可謂賢臣矣

康熙三十二年癸酉十二月癸未

上諭大學士等曰兵弁被創殘廢者雖已給身價之半而

不食錢糧則貧者無以為生此等皆奮力行間至於殘廢良可憫惻茲後若此殘廢中尚可支持者充南苑門兵倉庫諸地老人缺給以錢糧前為護軍校驍騎校今猶可支持者諸館之正副首領缺出用之

康熙三十三年甲戌九月甲申

上諭兵部凡地方防守官兵擒賊之時受傷身故者著給與身價銀兩著為令

康熙三十六年丁丑三月戊午

上駐蹕高家堡南昭武將軍馬思喀疏報原任勇畧將軍

趙良棟病故

上召隨駕總兵官白斌等諭曰趙良棟偉男子也行間著有勞績但性躁心窄每與人不合有時奏事朕前亦言語粗率朕保全功臣始終容之後有疾朕嘗遣賜藥食彼所奏無不准行此特欲有疾者喜悅而速愈耳今聞奄逝朕殊為惻然聞趙良棟存日與總兵官王化行不相能朕至寧夏務為其妻子區處使之安生斷不使受

害於其仇也

丙子

上自橫城渡黃河駐蹕河崖

諭大學士伊桑阿曰趙良棟乃為國立功之人今已身故
明日過其門著遣皇長子允禔部院諸大臣弔之賜祭
一次陳福亦為國効力之人現經此地亦賜祭一次

丁丑

上駐蹕寧夏

諭大學士伊桑阿曰朕臨此地著查寧夏官兵去年在昭
莫多翁金地方陣亡者兵丁賜之卹銀官員著遣官致
奠

康熙三十七年戊寅四月甲寅

上諭大學士等曰右衛西安陣亡撥什庫及披甲人等其
子著給與應得品級若令來京則貧者有移居之累著
停其前來仍留原處供職

六月丁卯兵部議奏原任步軍校雅母泰等因有

功牌應給半俸

上曰該部但以殘廢之人議給半俸其陣傷告退何以竝未議及若輩於行間被創不能供職深為可憫宜加特恩

十月戊午

上駐蹕盛京

諭內大臣等曰開國佐運動臣楊古利費英東額亦都三人効力甚可嘉尚此三人墓朕祭

昭陵之日親臨奠酒其餘諸臣効力亦屬可嘉康熙二十一年曾經祭奠者照前舉行頴親王薩哈廉克勤郡王岳托等墓各遣大臣致祭尋揚古利費英東額亦都之子孫公福善等奏曰

皇上欲親臨臣等之祖墓奠酒臣不勝惶懼伏祈

皇上停止

上諭之曰

太祖

太宗開國定鼎爾祖輔佐勲勞爾等未必詳悉朕比年來
觀閱

實錄知爾等之祖於開創時功績懋著深屬可嘉朕既親
來謁

陵必當臨爾祖墓奠酒爾等毋庸再奏

康熙三十八年己卯九月戊午

上諭大學士等曰大學士阿蘭泰効力年久品行清純辦
事敬謹朕聞其病篤先遣皇長子允禔往視朕尚欲親

臨及皇長子允禔回奏業已昏迷隨聞其溘逝朕深用震悼即遣皇長子允禔等臨其喪賜鞍馬四匹白金千金大臣病故雖無輟朝之例朕心不忍特停辦事一日

康熙三十九年庚辰八月己卯

上諭兵部將軍孫思克謀勇素裕居官甚優効力行間克奏膚功久鎮巖疆勤勞茂著允稱良將其從前所革世職著給還以示優眷

康熙四十年辛巳十月壬申

上諭大學士等曰前曾諭襲職之人如有殘疾將其職另襲他人但殘疾不准承襲無以養贍其先立功之人亦屬可憫嗣後應襲之人雖有殘疾仍令襲職但不與食俸止給每月錢糧俟其子孫應襲之年再令承襲若無子孫俟其本身故後始准另襲則公差無悞其先立功之人亦得沾恩該部詳議

康熙四十一年壬午二月己巳

上駐蹕真定府

諭大學士等曰此城十餘里有原任大學士梁清標墓
凡朕巡幸所及遇已故大臣墓俱遣大臣致奠爾等其
往奠之

四月甲戌

上諭予告大學士王熙曰卿耆年舊德歷官最久自去歲
告病在家朕無日不注念老臣也近日九卿皆求匾額
字對想卿身雖在告心未嘗一時不在朝中故特書匾
對各一并臨米芾書一幅賜卿卿其勉強餐食輔以醫

欽定四庫全書

聖祖仁皇帝聖訓
卷五十一

三

藥慰朕不忘舊臣之至意

十二月壬午

上諭大學士等曰原任吏部侍郎額星額因註誤革職非有大過今年已衰老朕比來巡歷所至凡以註誤罷職年老官員在籍者皆給與原官職銜以示朕優遇老臣之意額星額著以原銜給之

康熙四十二年癸未四月戊戌兵部議覆土司田舜年疏請以伊職令其嫡子田昞如承襲其次子

田旻如願入京備使令所給敕命免繳部俱無庸
議

上諭曰逆賊吳三桂作亂之時田舜年一心効力頗有勞
績著依所請令伊長子田昞如襲職原領敕命亦著免
繳部其次子田旻如著來京効力

是日

上諭大學士等曰頃朕往察河工原任侍郎任克溥於山
東途次迎駕見其年將九十現在諸臣未有如其久者

朕深為眷念著加刑部尚書銜以示優遇老臣至意可
諭吏部知之

五月戊申

上諭兵部直隸各省所有世職官員皆因彼祖父有功故
給以世職著召來引見如有馬步射俱優人才堪用者
及其年少補用

十一月戊申

上諭山西巡撫噶禮曰朕年少時衛周祚曾任大學士朕

今經過其地已令大臣往奠其墓爾可傳諭地方官將
伊孫照看俾讀書成立

丁巳

上駐蹕西安府閱駐防官兵射皆精練

上甚嘉悅因命記其善射之尤者

諭大學士等曰朕為西土兵民生計不辭地方遙遠冒涉
嚴寒躬行巡狩見西安右翼舊兵効力行間著有勞績
防戍頻仍不計其數人多帶傷其父與伯叔兄弟親戚

亦有陣亡者朕心深切軫念且皆循循奉法騎射熟嫻軍容整肅朕甚嘉之較之各省之兵尤為超出應大沛恩澤以示朕不忘勞勩人員之意隨賞賚銀兩有差

己未

上閱西安府兵召原任將軍佛尼勒之子額倫特賜酒

諭之曰爾父効力行間爾亦由兵丁効力以至協領因此親賜飲表異於衆又以鑲藍旗協領辛泰由步軍効力以至協領竝副將康泰韓忠俱人材矯健皆召至

階上令侍衛等飲之

康熙四十三年甲申十一月辛亥四川陝西總督
博霖疏叅涼州總兵官魏勲年老

上諭大學士等曰魏勲於軍前甚有勞績兵民亦皆愛戴
此等人材今西陲亦復有幾年邁令具呈請休可
也何必題叅原本發回又

諭曰魏勲及師帝賓麥良璽俱係舊臣詎可輕言叅劾前
者佛倫任總督時亦欲叅師帝賓曾面奏朕前朕不之

許如此等人若皆劾而罷之恐其餘寒心設有任用之處若等俱非易得者也提督潘育龍亦好武臣中一介不取操行俱全者實難得之但不犯法不貪冒即已矣且本朝邊疆武臣在地方不生一事與文臣同心効力兵民協和誠為自古所少今經歷軍陣之大臣已漸零落至於海戰又不得比於江湖前從福建海島來降者皆知海戰之法今亦少矣此可不留意乎

康熙四十四年乙酉二月辛巳

上諭大學士等曰原任刑部右侍郎勵杜訥向在南書房効力二十餘年為人敬慎積有勤勞竝無過譴其品級雖不及予謚之例曩者原任侍郎沈荃曾經予謚今勵杜訥亦著賜謚爾等會同禮部議奏

三月壬戌

上諭大學士等曰原任禮部侍郎高士奇在南書房効力年久頗著勤勞其品級不至予謚朕軫念舊臣原任刑部侍郎勵杜訥已照侍郎沈荃例子謚今高士奇亦應

予謚以示特恩爾等會同禮部議奏

四月己丑

上諭江南江西總督阿山等曰朕昨往雨花臺曾見原任總督傅拉塔祠堂傅拉塔居官甚好其叅劾之人雖多總無怨者大有氣節實心効力朕因是特書匾額賜之爾等刊畢可親懸其祠堂此匾額之字宜善加封裹給與其子

康熙四十五年丙戌六月丁亥朔

上諭修國史諸臣曰開國功臣作傳當因其事蹟先後以定次第若視功績分次第或有本人功績少而子孫功績多者反置子孫於前列可乎今應分別

太祖

太宗

世祖三朝功臣以何人居首請旨再定至逮事

三朝功臣各於本人傳內通行開載事蹟其子孫有立功者附載於下俟作傳畢可錄出分給其子孫各一通今

藏於家

七月丁巳兵部議覆原任雲南貴州總督巴什請
將進征紅苗陣亡被傷官兵加恩一疏應俟該督
分別議奏到日再議

上諭大學士等曰進征紅苗陣亡被傷官兵席爾達所奏
極明何俟督撫具題遲延日月彼時之督撫俱已更換
若俟伊等分別議奏其事必致遲久官兵不得沾實惠
矣

康熙四十六年丁亥五月戊寅

上諭吏部朕廑念河防屢行親閱凡自昔河道之源流及
歷來治河之得失按圖考蹟靡不周知粵從明末寇氛
決黃灌汴而洪流橫溢歲久不治迄於本朝在河諸臣
皆未能殫心修築以致康熙十四五年間黃淮交敝海
口漸淤朕乃特命靳輔為河道總督靳輔自受事以後
斟酌時宜相度形勢興建隄壩廣疏引河排衆議而不
撓竭精勤以自効於是淮黃故道次第修復而漕運大

通其一切經理之法具在雖嗣後河臣互有損益而規模措置不能易也至於創開中河以避黃河一百八十里波濤之險因而漕輓安流商民利濟其有功於運道民生至遠且大朕每莅河干徧加諮訪沿淮一路軍民感靳輔治績者衆口如一久而不衰夫人臣有大建樹於國家者獎勲酬庸宜從優渥雖賜卹易名已循彝典尚應特予褒敘貴以殊恩靳輔著加太子太保仍給世職拜他喇布勒哈番用彰朝廷追美勞臣之典為矢忠

宣力者勸

是日

上諭兵部國家綏輯兵民又安海嶠必資威望素重之臣以畀干城之寄有能久鎮巖疆實彰勞績者則錫命庸宜加顯秩福建水師提督吳英當王師初定八閩即親履行陣歷四十餘年比任提督以來益殫壯謀克修軍紀目前諸將中明習水性訓練舟師者罕與婉倫是用特賁殊恩俾膺異數著授為威畧將軍仍管水師提

督事務以示朕優眷勞臣至意

康熙四十八年己丑八月乙巳

上諭兵部國家慎簡武臣專膺闡寄惟是敕寧疆圉和輯軍民斯於地方大有裨益而酬庸獎勲之典宜加優渥陝西提督潘育龍久履戎行蔚有勞績歷試重鎮克殫謀猷自擢任西秦以來御兵飭伍有勇知方邊境肅清間閭安堵既威望之茂著亦年齒之日增茲特晉加顯秩用彰異數著授為鎮綏將軍仍管陝西提督事務以

示朕隆眷老臣至意

十一月己卯

上諭吏部漕運總督職任至為重要桑額自簡任治漕以來老成持重謹厚寬平殫力轉輸悉心經畫每歲身親攢運俾漕艘依期抵通十餘年間從無稽遲貽誤之事且馭衆有法恤下有恩所屬運官旗丁無不感頌愛戴不愧為地方大吏今年齒已長而精力未衰久任勤勞良可嘉尚著特授兵部尚書兼都察院右都御史仍加

太子太保以示朝廷崇獎老臣酬庸褒勲至意

康熙四十九年庚寅三月乙亥吏部以提督四譯

館太常寺少卿員缺請補

上諭大學士等曰今觀漢大臣俱已年邁繼此可用者難得其人至於直隸現為大臣者無一人矣昔如魏裔介李蔚杜立德王熙梁清標等俱優任大學士始終恪慎懋著勤勞今李蔚嫡孫工部主事李敏啟著越格陞補提督四譯館太常寺少卿以示朕崇獎舊臣優錄後嗣

至意

十二月辛巳

上諭吏部朕每因朝列舊臣漸次哀謝時切軫懷特命內閣查順治年間進士罷職在籍者已無多人其王士正江臯周敏政葉矯然徐淑嘉宋慶遠皆以公事註誤屏廢里居今年臻耄耄深可憫念著復還原職以示朕格外加恩至意

康熙五十年辛卯五月丁未

上諭大學士等曰朕自幼讀書見大臣多不能保其初終故立志待大臣如手足不論滿漢蒙古非大姦大惡法不可容者皆務保全之五十年來如大學士蔣赫德衛周祚李霽杜立德馮溥黃機吳正治王熙李之芳宋德宜梁清標李天馥張英熊賜履吳璵陳廷敬皆以年老告辭林下怡養保全名節朕亦未嘗少忘常使人存問始終如此凡在朝諸大臣朕待之甚厚伊等亦矢忠盡力歷數十年之久與朕同鬚髮皤然矣

康熙五十二年癸巳三月壬寅

上諭大學士等曰年老諸大臣內曾於

世祖章皇帝時居官者惟宋犖田種玉而已今以年齒老邁閒居林下宋犖現有尚書品級在身田種玉著給與工部尚書銜俱准給誥封宋犖田種玉著酌加宮保以示朕不忘耆舊之至意

康熙五十八年己亥正月辛丑


上諭議政大臣等曰有本人立功授職後因年老或染病

解任襲與兄弟子姪承襲之人若經病故即不准承襲立功之人現在而遽謂承襲世次已完不准襲職殊屬可矜嗣後立功授職之人本身若在理宜再准承襲一次爾等會議具奏

康熙五十九年庚子四月戊午戶部尚書趙申喬以哀疾乞休

上諭大學士等曰覽趙申喬奏疏朕深憐之念其操守清廉始終一轍性雖暴躁而為人樸直年近八旬病勢料

難全愈倘一時不保亦未可定趙申喬乃革職留任之
官可復還原職仍令在任調理其應賠之銀亦著從寬
免追爾等將此旨速行發去使病人早知一日五內安
寧便於調攝頤養也



大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷五十一

欽定四庫全書

史部

聖祖仁皇帝聖訓卷五十七
二至

臣 永瑤 恭 校

編修_臣 裘謙 懋 勸

總校官原任中允_臣 王燕緒

校對官中書_臣 王鍾泰

謄錄監生_臣 劉 禮

欽定四庫全書

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷五十二

廣幅員

康熙二十三年甲子四月己酉

上諭戶部兵部臺灣僻處海外新入版圖應設立郡縣營
伍俾善良寧宇姦宄消萌教化既行風俗自美著於赤
墘設臺灣府附郭為臺灣縣鳳山為鳳山縣諸羅山為

諸羅縣設一道員分轄又設總兵一員副將二員兵八千名分為水陸八營澎湖設副將一員兵二千名分二營每營設遊守千把等官

康熙二十五年丙寅正月甲戌

上諭大學士勒德洪學士麻爾圖曰日者大兵往征鄂羅斯破雅克薩城釋鄂羅斯不誅赦之使生還其時不並取尼布潮地者蓋以尼布潮地畫為疆索使鄂羅斯不得越尼布潮界外聽其捕牲也今薩布素等奏言鄂

羅斯復來城雅克薩地今當即往征而滅之耶抑或緩之以待黑龍江墨爾根地方將士移家既定然後進兵為宜耶令議政王貝勒大臣及與鄂羅斯之役彭春佟保班達爾沙郎談同爾等會議以聞

康熙三十五年丙子五月丙子

上駐蹕席喇布里圖諸蒙古王等因大敗噶爾丹行慶賀禮跪奏云

皇上念我外藩蒙古不辭勞苦七旬之內行三千里無水

草之地立奏膚功誠世所罕有

皇上聖德神功如此誰不傾心歸服

上曰爾等於引路探信牧馬掘井諸事甚為効力誠屬可嘉朕必重加賞賚朕昔以汎界之內視為一家今土喇克魯倫以內皆為一家矣

康熙三十九年庚辰六月庚寅

敕諭王布忒達阿普提曰邊境素有定處爾縱放營官喋吧昌側集烈將四川打箭爐土司蛇蜡喳吧居住地方

恃強盡行霸占漸次侵踞河東烏泥若泥凡州三處潛
有窺伺嘉慶擦道之意先經欽差侍郎羅察等往勘營
官猶然踞坐有侮慢天使之處今因內土司蛇蜡喳吧
漏言將土司蛇蜡喳吧以致於死種種狂悖實難寬假
川陝總督席爾達已經具題據此豈非爾私示所屬人
等侵犯生事邊境地方豈可讓與寸地此等事情爾俱
違悖妄行敕旨一到將漸次侵占打箭爐版圖內土司
地方俱著退還打死內土司蛇蜡喳吧之營官即拏解

送不然生事之罪歸於爾身彼時悔之不及矣

七月乙卯大學士等將鄂羅斯差人所奏本章進
呈

上曰鄂羅斯地方遙遠僻處西北海隅然甚誠敬噶爾丹
窘迫求救彼曾拒而不答曩者遣人分畫邊界即獻尼
布潮地以東為界尼布潮等處原係布拉忒吳梁海諸
部落之地彼皆林居以捕貂為業人稱為樹中人後鄂
羅斯強盛遂并吞之已五六十年矣遠服聲教畫疆獻

地出自忠誠即此允當軫念也

康熙五十年辛卯五月癸巳

上諭大學士等曰天上度數俱與地之寬大脗合以周時之尺算之天上一度即有地下二百五十里以今時之尺算之天上一度即有地下二百里自古以來繪輿圖者俱不依照天上之度數以推算地里之遠近故差誤者多朕前特差能算善畫之人將東北一帶山川地里俱照天上度數推算詳加繪圖視之混同江自長白山

後流出由船廠打牲烏喇向東北流會於黑龍江入海
此皆係中國地方鴨綠江自長白山東南流出向西南
而往由鳳凰城朝鮮國義州兩間流入於海鴨綠江之
西北係中國地方江之東南係朝鮮地方以江為界土
門江自長白山東邊流出向東南流入於海土門江西
南係朝鮮地方江之東北係中國地方亦以江為界此
處俱已明白但鴨綠江土門江二江之間地方知之不
明即遣部員二人往鳳凰城會審朝鮮人李萬枝事又

派出打牲烏喇總管穆克登同往伊等請訓旨時朕曾
密諭云爾等此去并可查看地方同朝鮮官沿江而上
如中國所屬地方可行即同朝鮮官在中國所屬地方
行或中國所屬地方有阻隔不通處爾等俱在朝鮮所
屬地方行乘此便至極盡處詳加閱視務將邊界查明
來奏想伊等已由彼起程前往矣此番地方情形庶得
明白

八月辛酉

上諭大學士等曰前差打牲烏喇總管穆克登等查看鳳凰城至長白山邊界伊等業將所查地方繪圖呈覽因路遠水大故未能至所指之地著於來春冰解之時自義州乘小舟溯流而上至不可行之處令其由陸路向土門江查去但道路遙遠萬一中途有阻令朝鮮人供應將此情由令該部曉諭來朝正之朝鮮國官員書文給與帶付伊王

康熙五十三年甲午七月丙寅

上諭大學士等曰拉藏汗題請打箭爐地方朕思打箭爐原係本朝之地人民攸聚於拉藏汗大有裨益若行撤回則茶市亦停大無益於伊等倘必要此地著伊親來與我諸王大臣等會議

康熙五十九年庚子十月庚戌定西將軍噶爾弼疏報八月二十三日進取西藏傳西藏大小第巴頭目喇嘛等宣示

聖主威德隨將倉庫封閉扎立營寨撥兵截準噶爾之運

糧要路其策零敦多布偽授總管之喇嘛五名即
行正法尚有準噶爾之喇嘛九十六名監禁請

旨

上曰噶爾弼等遵朕指授率領官兵歷從古用兵未到之
絕域各加奮勵克取藏地將準噶爾人等信用之逆惡
番僧五人正法撫綏唐古特土伯特人民甚屬可嘉在
事將軍以下兵丁以上俱著從優議叙

十一月辛巳

上諭大學士學士九卿等曰朕於地理從幼留心凡古今山川名號無論邊徼遐荒必詳考圖籍廣詢方言務得其正故遣使臣至崑崙西番諸處凡大江黃河黑水金沙瀾滄諸水發源之地皆目擊詳求載入輿圖今大兵得藏邊外諸番悉心歸化三藏阿里之地俱入版圖其山川名號番漢異同當於此時考証明核庶可傳信於後大槩中國諸大水皆發於東南諾莫渾烏巴西大幹內外其源委可得而縷析也黃河之源出西寧外枯爾

坤山之東衆泉渙散不可勝數望之燦如列星蒙古謂之敖敦他拉西番謂之梭羅木中華謂之星宿海是為河源匯為薩陵鄂陵二澤東南行折北復東行由歸德堡積石關入蘭州岷江之源出於黃河之西巴顏哈拉嶺七七喇哈納番名岷尼雅克撮漢書所謂岷山在西徼外江水所出是也而禹貢導江之處在今四川黃勝關外之乃褚山古人謂江源與河源相近禹貢岷山導江乃引其流非源也斯言實有可據其水自黃勝關流

至灌縣分數十支至新津縣復合而為一東南流至敘州府與金沙江合流金沙江之源自達賴喇嘛東北烏尼尹烏蘓嶺流出烏尼尹烏蘇嶺中華謂之乳牛山也其水名穆魯斯烏蘇東南流入喀木地又經中甸入雲南塔城關名金沙江至麗江府又名麗江至永北府會打衝河東流經武定府入四川界至敘州府流入岷江經夔州府入湖廣界由荊州府至武昌府與漢江合漢江源出陝西寧羌州北蟠冢山名漾水東流至南鄭縣

為漢水入湖廣界東南流至漢陽縣漢口合岷江此諸水在東南諾莫渾烏巴西大幹之內源發於西番委入於中國也瀾滄江有二源一源於喀木之格爾幾雜噶爾山名雜褚河一源於濟魯肯他拉名敖穆綽河二水會於察木多廟之南名拉克褚河流入雲南境為瀾滄江南流至車里宣撫司名九龍江流入緬國瀾滄之西為哈拉烏蘇即禹貢之黑水今雲南所謂潞江也其水自達賴喇嘛東北哈拉腦兒流出東南流入喀木界又

東南流入怒夷界為怒江入雲南大塘隘更名潞江南
流經永昌府潞江安撫司境入緬國潞江之西為龍川
江龍川江之源從喀木所屬春多嶺流出南流入雲南
大塘隘西流為龍川江至漢龍關入緬國此諸水在東
南諾莫渾烏巴西大幹之外皆流入南海也又雲南邊
境有檳榔江者其源發自阿里之岡底斯東達木朱喀
巴卜山譯言馬口也有泉流出為雅魯藏布江從南折
東流經藏危地過日噶公喀兒城傍合噶爾詔模倫江

又南流經公布部落地入雲南古勇州為檳榔江出鐵壁關入緬國而岡底斯之南有山名郎千喀巴卜譯言象口也有泉流入馬皮木達賴又流入郎喀腦兒兩河之水西流至桑南地岡底斯之北有山名僧格喀巴卜譯言獅子口也有泉流出西行亦至桑南地二水合而南行又折東行至那克拉蘇穆多地與岡底斯西馬卜家喀巴卜山所出之水會馬卜家喀巴卜者譯言孔雀口也其水南行至那克拉蘇穆多地會東行之水東

南流至厄納忒可克國為岡噶模倫江即佛法所謂恒河也佛國紀載魏法顯順恒河入南海至山東之渤海入口應即此水矣梵書言四大水出於阿耨達山下有阿耨達池以今考之意即岡底斯是唐古特稱岡底斯者猶云衆山水之根與釋典之言相合岡底斯之前有二湖連接土人相傳為西王母瑤池意即阿耨達池又梵書言普陀山有三一在厄納忒可克之正南海中山上有石天宮觀自在菩薩遊舍是云真普陀一在浙江

之定海縣海中為善財第二十八參觀音菩薩說法處
一在土伯特今番名布塔拉山也亦謂觀音見身之地
釋氏之書本自西域故於彼地山川亦可引以為據也
禹貢導黑水至於三危舊註以三危為山名而不能知
其所在朕今始考其實三危者猶中國之三省也打箭
爐西南達賴喇嘛所屬為危地拉里城東南為喀木地
班禪額爾德尼所屬為藏地合三地為三危耳哈拉烏
蘇由其地入海故曰導黑水至於三危入於南海也至

於諸番名號雖與史傳不同而亦有可據者今之土伯
特即唐之突厥唐太宗時以公主下降公主供佛像於
廟今番人名招招者譯言如來也其地猶有唐時中國
載去佛像明成化中烏斯藏太寶法王來朝辭歸時以
半駕鹵簿送之遣內監護行內監至四川邊境即不能
前進而返留其儀仗於佛廟至今往來之人多有見之
此載於明實錄者爾等將山川地名詳細考明具奏

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷五十二